

Medida sira ba prevensaun no kontrolo COVID-19 – Ministériu Ensinu Superior, Siência no Kultura

Prezidénsia Konsellu Ministrus

VIII Governu Konstitusionál

Díli, loron 22 fulan marsu tinan 2020

Komunikadu Imprensa

Medida sira ba prevensaun no kontrolo COVID-19

Ministériu Ensinu Superior, Siência no Kultura

Ministériu Ensinu Superiór, Siénsia no Kultura manifesta ninia preokupasaun maka'as ho pandemia mundiál ne'ebé provoka husi virus COVID-19, hanesan ho saida maka Organizasaun Mundiál Saúde klasifika ona iha loron 11 fulan-marsu tinan 2020 liubá.

Virus ne'e da'et fasil tebes no, tanba ne'e, espalla lalais los iha mundu tomak hodi afeta ona nasaun 180 resin. Timor-Leste iha ona kazu konfirmadu ida no urjente tebes atu implementa medida sira ne'ebé bele kontribui ba prevensaun no kontrolo ba pandemia ida-ne'e.

Haree ba katak COVID-19 fó risku boot ba saúde públika, ita tenke kumpre duni, ho rigór, rekomendasaun sira husi Ministériu Saúde no Organizasaun Mundiál Saúde nian iha Timor-Leste, atu ita bele satan virus ne'e da'et habelar.

Tanba ne'e, no bazeia ba kompeténsia Ministériu Ensinu Superiór, Siénsia no Kultura nian, ne'ebé estabelese ona iha artigu da-23 n.1 husi Dekretu-Lei n. 14/2018, loron 17 fulan-agostu, no ho respeito ba autonomia establesimentu ensinu superiór sira-nian iha definisaun ba ninia kalendáriu letivu, **husu ba establesimentu ensinu superiór nian hotu-hotu, públiku no privadu sira, atu suspende atividade letiva prezensial sira**, no karik bele, buka estratéjia no/ metodolojia foun sira hodi asegura prosesu ensinu no aprendizajen. Husu mós atu kansela atividade hotu-hotu ne'ebé halibur ema/ comunidade akadémika nian.

Nune'e, husu atu medida ida-ne'e adota ba períodu loron 23/3/2020 to'o loron 4/4/2020. Medida ida ne'e sei hetan avaliasaun beibeik no sei estende karik presiza.

Ministériu Ensinu Superiór, Siénsia no Kultura agradese ba kolaborasaun husi ema hotu no apela hotu-hotu atu hakmatek nafatin atu, ba ema hotu nia dí'ak no liuhusi esforsu hamutuk, ita bele hakat liu dezafiu boot globál ida-ne'e. **REMATA**

url: <http://timor-leste.gov.tl?lang=tp&p=23845>